



Na osnovu člana 24. Statuta Općine Gradačac („Službeni glasnik Općine Gradačac“, br. 4/08, 5/12 i 1/17 ) i člana 39. Zakona o socijalnoj zaštiti, zaštiti civilnih žrtava rata i zaštiti porodice sa djecom TK („Sl.novine TK“, br. 05/12,07/14 i 11/15 ), Općinsko vijeće Općine Gradačac, na sjednici od \_\_\_\_\_ 2017.godine, donosi

**ODLUKU**  
**o subvencioniranju troškova potrošnje vode i otpadne vode**

**Član 1.**

Ovom Odlukom utvrđuju se uslovi, kriteriji i postupak subvencioniranja troškova potrošnje vode i otpadne vode, po osnovu poskupljenja (korekcija cijena) utvrđenim rješenjem Općinskog vijeća Općine Gradačac, br. 02-3026/14 od 17.12.2014. godine, čime Općina Gradačac želi preuzeti teret za građane, kojim bi ovim poskupljenjem bio ugrožen standard življenja.

**Član 2.**

Subvencioniranje obuhvata usluge snabdijevanja vodom za piće, prikupljanja i odvođenja otpadnih voda ( u daljem tekstu: „Javne vodne usluge“ ) prema JP „Komunalac“ d.d. Gradačac, i to razlike u cijeni, u odnosu na stanje prije i poslije korekcije cijene vode i otpadne vode.

**Član 3.**

Pravo na subvencioniranje mogu ostvariti samo korisnici Javnih vodnih usluga, kojim upravlja JP „Komunalac“ d.d. Gradačac.

Pravo na subvencioniranje ostvaruju korisnici Javnih vodnih usluga, koje je nadležna JU Centar za socijalni rad Gradačac ili nadležna služba Općine Gradačac prepoznala i registrovala, kao socijalno ugrožene osobe sa nedovoljnim prihodima za preživljavanje (korisnici stalne socijalne pomoći), i korisnici sa prihodima do iznosa najniže penzije u Federaciji Bosne i Hercegovine, i ista se priznaje za razliku mjesečne potrošnje po domaćinstvu u količini do 5 m<sup>3</sup>.

**Član 4.**

Iznos subvencije je razlika u važećoj cijeni Javnih vodnih usluga u odnosu na dan 31.12.2014.godine, i iskazuje se na računu za Javne vodne usluge, za koliko se umanjuje račun.

**Član 5.**

Iznos računa koji prelazi subvencioniranu količinu utrošene vode se fakturiše korisniku, kao redovan račun. U slučaju da korisnik usluge ne plati ovaj „redovni račun“ isti podliježe proceduri i sankcijama, koje JP „Komunalac“ d.d. Gradačac preduzima prema svim dužnicima Javnih vodnih usluga.

## Član 6.

Sredstva za realizaciju subvencije iz ove Odluke obezbijedit će se u budžetu Općine Gradačac i prosljeđuju JP „Komunalac“ d.d. Gradačac po dostavljenom računu svakog mjeseca, koji se odnosi na količinu vode, koja je isporučena registrovanim osobama, čiji je popis dostavila Općina Gradačac, a koji se subvencionira, i stoga nije fakturisana ovim osobama.

Ova sredstva se koriste kao namjenska sredstva isključivo za potrebe subvencioniranja, te se u druge svrhe ne mogu koristiti.

## Član 7.

Opšti uslovi za određivanje subvencije su:

- da korisnik Javnih vodnih usluga ima prebivalište na području Općine Gradačac,
- da je korisnik Javnih vodnih usluga svojstvo, odnosno pravo na osnovu koga se svrstava u kategoriju korisnika stekao na osnovu propisa, koji se primjenjuju u Bosni i Hercegovini,
- da račun glasi na korisnika Javnih vodnih usluga,
- da je korisnik potpuno izmirio obaveze prema računima za Javne vodne usluge iz ove Odluke.

## Član 8.

Neophodna dokumentacija za dokazivanje ispunjenosti uslova za subvencioniranje je:

- 1.Dokaz o visini penzije (posljednji ček) ili uvjerenje Centra za socijalni rad, da je korisnik prava stalne socijalne pomoći,
- 2.Uvjerenje ispostave Poreske uprave o prihodima svakog člana domaćinstva pojedinačno,
- 3.Prijava prebivališta za sve punoljetne članove domaćinstva i da se prebivalište korisnika i članova domaćinstva nalaze na istoj adresi na kojoj se nalazi nepokretnost za koju se podnosi zahtjev za subvenciju,
- 4.Posljednji račun za Javnu vodnu uslugu izdat od strane pružaoca usluga, da nema neizmirenih obaveza prema pružaocu usluga sa 31.12.2014.godine,
- 5.Izjava korisnika da pod punom krivičnom i materijalnom odgovornošću daje tačnost podataka za ostvarivanje subvencije.

## Član 9.

Korisnik Javnih vodnih usluga ukoliko pripada kategoriji iz člana 3. Ove Odluke, i želi subvencioniranje podnosi zahtjev Općinskoj službi za urbanizam, investicije i komunalne poslove radi ostvarivanja subvencije iz člana 4. ove Odluke.

## Član 10.

Po utvrđivanju uslova ispunjenosti uslova iz ove Odluke, nadležna Služba donosi rješenje o pravu na subvencioniranje razlika u cijeni, i sastavlja spisak korisnika subvencionisane cijene, koji dostavlja pružaocu Javnih vodnih usluga do petog (5) u mjesecu za protekli mjesec.

Rješenje se donosi sa rokom važenja od godinu dana.

Na osnovu spiska iz stava 1. ovog člana, pružaoac usluge vrši obračun za subvenciju i istu sa zahtjevom za doznaku sredstava dostavlja Općini Gradačac za isplatu refundacije subvencije.

## Član 11.

Korisnik subvencije ima obavezu da redovno izvještava nadležnu Općinsku službu o svim promjenama, koje mogu da utiču na ostvarivanje prava na subvencionisanje (promjena prebivališta, broj članova domaćinstva, zaposlenost itd.).

## Član 12.

Općina Gradačac će u cilju upoznavanja javnosti sa postupkom subvencioniranja vršiti Javnu objavu popisa subvencioniranih osoba putem oglasne ploče, svojih web stranica i JU Centra za socijalni rad Gradačac. Nadležna Općinska služba podnosi izvještaj Općinskom vijeću Gradačac u vezi sa subvencionisanjem (broj osoba, utrošenih sredstava itd ) jednom ( 1 ) godišnje.

## Član 13.

Ova odluka stupa na snagu danom donošenja, a primjenjivat će se prvog narednog mjeseca od dana donošenja i bit će objavljena u „Službenom glasniku općine Gradačac“.

BOSNA I HERCEGOVINA  
FEDERACIJA BOSNE I HERCEGOVINE  
TUZLANSKI KANTON  
OPĆINA GRADAČAC  
-Općinsko vijeće-

Broj: 01-05- /17  
Datum: \_\_\_\_\_ 2017.godine  
Gradačac

PREDSJEDAVAJUĆI  
OPĆINSKOG VIJEĆA  
Šakić Enir, prof.,s.r.

## O b r a z l o ž e n j e

Projekat općinskog okolišnog i ekonomskog upravljanja (MEG) podržava jačanje operativne neovisnosti, te efikasno i održivo poslovanje javnih vodovodnih preduzeća, koja svojim korisnicima usluga isporučuju javne vodne usluge i da iste trebaju biti plaćene prema utvrđenim cijenama usluga. Općina Gradačac, kao implementator Projekta vodosnabdijevanja Gradačac donijela je rješenje o davanju saglasnosti na nove cijene vode po zahtjevu JP „Komunalac“ d.d. Gradačac, br. 02-3026/14 od 17.12.2014.godine u skladu sa zahtjevom Evropske banke za obnovu i razvoj (EBRD).

S obzirom da JP „Komunalac“ d.d. Gradačac mora poštovati principe tržišnog poslovanja i s obzirom na povećanje cijene vode, problem redovnog plaćanja ovih usluga nastaje, zbog toga što znatan broj građana BiH živi na granici ili ispod granice siromaštva i stoga nisu u mogućnosti izmiriti račune za pružene javne vodne usluge. Navedeni problem je moguće riješiti donošenjem Odluke o subvencionisanju troškova potrošnje vode i otpadne vode od strane Općine Gradačac. Odgovornost Općine Gradačac za subvencionisanje Javnih vodnih usluga proizilazi iz njene nadležnosti za provođenje socijalne politike na njenom teritoriju u skladu sa Zakonom o socijalnoj zaštiti, zaštiti civilnih žrtava rata i zaštiti porodice sa djecom Tuzlanskog kantona, kojim je propisano da jedinice lokalne samouprave svojom odlukom mogu proširiti krug korisnika i prava iz socijalne zaštite, a kao jedno od prava javlja se subvencionisanje troškova komunalnih usluga najugroženijim kategorijama stanovništva.

Općina Gradačac će subvencionisati Javne vodne usluge prema JP „Komunalac“ d.d. Gradačac, i to razlike u cijeni Javnih vodnih usluga u odnosu na dan 31.12.2014.godine, i iskazivat će se na računu za Javne vodne usluge izdatih od strane JP „Komunalac“ d.d. Gradačac za koliko se umanjuje račun.

Općina će svake godine utvrđivati spisak subvencioniranih korisnika usluga i dostavit će pružaocu usluge, na osnovu kojeg će pružaoc usluga vršit obračun za subvenciju i istu sa zahtjevom za doznaku sredstava dostaviti Općini Gradačac za isplatu refundacije subvencije. Subvencionisat će se količina utrošene vode, koja ne može biti veća od 5 m<sup>3</sup> po domaćinstvu. Potencijalni korisnik subvencije podnosi zahtjev nadležnoj Službi, nakon čega će se provesti upravni postupak, i u skladu sa pozitivnim zakonskim propisima iz oblasti socijalne zaštite i uslova definiranih Odlukom o subvencioniranju donijeti rješenje, kojim se utvrđuje da se podnosilac zahtjeva nalazi u stanju socijalne potrebe, i kojem se kao takvom priznaje pravo na subvencionisanje dijela troškova Javnih vodnih usluga. Rješenjem će se utvrditi broj članova domaćinstva podnosioca zahtjeva i količina vode koja se subvencionira, a u skladu sa Odlukom o subvencionisanju troškova potrošnje vode i otpadne vode.

Rješenje se donosi sa rokom važenja od godinu dana, a nakon isteka ovog perioda stranka može ponovo podnijeti zahtjev za subvencionisanje.

**Obrađivač:**  
**Općinska služba za urbanizam, investicije**  
**i komunalne poslove**

**Predlagač:**  
**Općinski načelnik**  
**mr sci. Edis Dervišagić**